

Sonde: Bible for Mark

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Mark

Chapter 1

¹Aha ha yandjika tsangu jia mboti jia Yesu Khidishitu mwana wa Nzambi. ²Mubikudi Yesaya wa sonikini mu mukanda wenji etshi, talenu na tumisa ngenji wemi kudi ayi. Mweni waka kuhangikila nzila. ³Idi ndaka ya muthu ukwakulanga mu timu dia zelu ni zelu. Hangikenu ndjila ya fumu seleni miseya yonunuka. ⁴Yoani wejidi kubotika mu thotu ya zelu ni zelu ni kulonga mbotika ya kusoba ifu kikuma kia mvidishilu ya masumu. ⁵Akwa kifutshi kia Yudai osu ni akwa Yeluselemi akedi kwenda kudi mweni. Akhedi kuwa botika mu meya me Yoludani. Akhedi kukumbula masumu mowu. ⁶Yoani wa vwatanga muledi wa mavuji ma mikoku ni mukaba wa kiketa kia mbiyi wa mutemu. ⁷Wakulanga etshi : muthu ukwiza kumanima memi wudi ni ngolu jia hita ami nia lungidiku mu kukasulula mishinga ya sapatu jienji. ⁸Ami, nianu botikidi ni meya, mweni waka nu botika ni pevi la longu. ⁹Ya hangimini etshi kilumbu kiena kina Yesu wejidi kudimbu dia Nazaleti thotu ya Galilea amubotiki kudia Yoani mu meya ma Yoludani. ¹⁰Tangwa Yesu awudikidi mu meya wamona wulu dianzuluka pevi ya mu kulumukima mudi bembu. ¹¹Wewwa ndaka ya katuka ku wulu yakwa. Ayi wudi mwanemi wu na zola hengi wenda kunguhwa kieshi. ¹²Kumanima pevi ya mu senda mu thotu ya azelu ni zelu. ¹³Wakhedi ilumbu makumi mawana mu thotu ya zelu ni zelu. Satana weza kumu hukumuna . Wa jinganga ni ambiji a mutemuni awanjo ni kumuhangila. ¹⁴Ku manima ma kusha Yoani mu boloku, Yesu wendidi ku Galilea wa longa tsangu jia mboti jia Nzambi. ¹⁵Ni kwakula etshi tangwa dia lunga, kifumu kia Nzambi kia kokuluka balulenu, kwikilenu tsangu. ¹⁶Tangwa dia kibanga mu khulu dia jija dia Galilea wa mona Simoni ni Andela pangi wa Simoni watanga wanda mu meya, kikuma akhedi alowi. ¹⁷Yesu wa waleza, izenu nungu labi ni kunwikinisa alowi athu. ¹⁸Kikimweni ashisa wanda amu laba. ¹⁹Yesu kia kibanga wa mona kulepi Jacky mwana wa Zebede ni Yoani mwakienji akhedi mu watu ahangikanga mawanda. ²⁰Wa watambika, ashisa tatowu Zebede mu watu ni athu jiwu akisalu amu laba. ²¹Waya ku Capernahum, kilumbu kia lumingu , Yesu waya ku inzu ya Isambu wa yandjika kulonga. ²²Athu ayitukidi mu kwivwa malongi menji kikuma ka longidiku mudi afumu ajitshiku kikuma wa walonganga ni kifumu kiosu. ²³Kaka tangwa diene dina muthu mumoshi wakhedi ni pevi jia bola mu inzu ya isambu wakula ngolu. ²⁴Ekhi yidi ni etu ni ayi Yesu wa Nazareth? wejidi kutu nzanga? nejija mboti nani wudi wa konda masumu wa katuka kudi Nzambi. ²⁵Yesu wa nganina pevi ya bola wa ileza dibati wudika mudi muthu owu. ²⁶Pevi ya bola ya mubwisa hashi ya wudika kudi muthu owu wa tatula mu ndaka ya ngolu. ²⁷Athu osu ayituka ayanjika ku dihangana owumweni ekhi yiyi? Malongi ma katataka ma kulonga ni kifumu kiosu. Wenda leza ni jipevi ya bola ni kumwivila. ²⁸Swalu tsangu jia Yesu jia kiba mu thotu yosu ya Galilea. ²⁹He tangwa dia wudika mu inzu ya isambu waya kunjia Simoni ni Andela osu ni Jaki ni Yoani. ³⁰Muku tala mahenda wa mukhetu wa Simoni wakhedi wa langala ni kuyela he aleza Yesu. ³¹Tangwa Yesu atula wa mukwata kukoku wa muzangulusa. Makhashi mahwa wa kola wa yanjika kuhanga ima ya kudia. ³²Kingweja kienekina pipa kubwa kadi loni, ayandjika ku mnehina athu osu akhedi ni makhashi awana akhedi ni jipevi jia bola. ³³Dimbu diosu dieza kuzala ha kisu kia inzu. ³⁴Wa hulushidi athu lawu akhedi ni makhashi ma mutshindu ni mutshindu ni awana akhedi nu jipevi jia bola, kahwediku pevi jia bola tangwa dia kwakula kikuma jia khedi kumwijiya. ³⁵Watokimini mu suka suka diosu kuma ki kwakhedi ni kapipa, waya kukhala enji mweni wa yanjika kusamba Nzambi. ³⁶Simoni ni athu akhedi nawu ayanjika ku muhenga. ³⁷Amu mona amu leza etshi athu osu henda akuhenga. ³⁸Mweni wakula etshi twendenu kuma kweka ni mu membu mekha kikuma niendi kulonga epi. Kieni kioki nejididi. ³⁹Aya mu thotu yosu ya Galilea yandjika kulonga mu manzu mosu ma isambu, ni kukanga jipevi jia bola. ⁴⁰Muthu mu moshi wakhedi ni makhashi ma bwashi weza kudi mweni, wa yandjika kumu bondila, wa fukama wa lomba lusadisu ni kwakula, ivwa wa zola walunga kungu kodisa. ⁴¹Yesu khenda jia mukwata wa tandulula koku dieni wa mukwata, wa muleza etshi : Nia zola. kola. ⁴²Thama loni, bwashi dia mukatuka muthu wakola. ⁴³Yesu wamu lekisa kwakula wamu leza ndanga wendi kweyi. ⁴⁴Wamu leza etshi ulezoku muthu ndanga wudi lombuludi kudi anganga Nzambi uhani makabu ma kukatula nvindu ma sonikini Moise mu mikanda yenji. Kikuma uhani kimbangi kudi heni. ⁴⁵Mweni kama, wa wudika wayanjika kwenda kuleza athu osu, ni kwenda kulonga ndaka ya Nzambi he Yesu pila kulonga epi ndaka ya Nzambi loni mu membu mekha. Kieni kioki wa sola kasu homa ha moshi enjimweni. athu ayandjika kwiza muma mwosu.

Chapter 2

¹Ku manima dia ilumbu Yesu wa vutukidi ku Capernaum athu evidi tsangu etshi Yesu wa vutuka kunzu ²Athu lawu akungimini mu pila etshi kwa khediku epi ni homa ha kuhitila ata ku kianzuluku Yesu wawa longidi ndaka ya Nzambi ³Ndambu ya athu ya tudidi aneha kudi Yesu muthu wakhedi wa wokumuka wa kunanguna kudi athu awana ⁴Kwakhediku ni pila ya kusenda muthu mwenowuna kudi Yesu kikuma hunji diathu dia khedi hohu he aninini ha yangi dia inzu adikangula ha wulu dia Yesu akulumushini muthu wa wokumuka wa ditanda ha kiandu ku twala ya Yesu ⁵He Yesu wa mona etshi muthu wa khedi ni lukwikilu lwa kukola wa leza muthu wa wokumuka mwana weni masumu meyi nia na lolula ⁶Kashi ndambu ya asoniki akhedi ashikama hohu a banjidi ku mitshima miowu ⁷Kiehi muthu owu akula kienekina wa kamuna nani wa lunga ku lolula masumu ivwa kesuku Nzambi ⁸He Yesu wejiki mu pevi yenji ya longu mabanza makhedi ni athu ku mitshima wa waleza ekhi nuku banzilalanga mambu menama ku mitshima yenu ⁹Ekhi yi ngudi ya hitangana kuzeya kwakula, masumu meyi ma kuvidishila ho zanguluka nona kiandu ndanga ¹⁰Kashi kikuma nuijiyi etshi mwana muthu wudi ni kiyeka kia kuvidishila masumu hashi waleza muthu wa wokumuka ¹¹zanguluka

Chapter 3

moma kiandu kieyi ndanga kunjeyi ¹²Thama loni muthu wa zanguluka wanona kiandu kienji waya ku mesu ma athu osu eni osu ayitukidi ni ku kumisanga Nzambi ni kwakulanga theti twa mweniku kadi mamabu ma mutshindu owu ¹³Yesu wa katuka ku Capernaum wa kiba mu khulu ya jiya hunji diosu diezanga kudi mwani he ni ku walonga ¹⁴Mu kuhita wa mwani muthu jina dienji Levi mwana wa Alphe wakhedi wa shikama ha iznu ya kufutishila kitadi Yesu wamu leza ngu labi wa zangulukidi wa mu laba ¹⁵Ku manima Yesu wadidi madia munzia Levi afutishi ayitadi ni athu ekha abola akhedi kudia nenji ni alonguki jenji kia mulabanga kikuma akhedi lawu ¹⁶Asoniki ni Afarize kia amweni Yesu ni kudia ni athu abola ni afutishi itadi ahudidi alonguki jenji kikuma kiakhi aku dilanda ni ku nwinanga ni asumuki ni afutishi akitadi ¹⁷Yesu kievidi kienekina wa waleza athu akola endoku ku khala ni fhunu ya munganga idi akhashi enda kuhenga munganga Niejidiku kikuma kia athu awaha kashi niejididi asumuki ¹⁸Alonguki a Yoani nu a Farize alekidi kudia athu ekha ejidi ku muleza kikuma kiakhi alonguki a Yoani ni alonguki a aFarize aku lekilanga kudia ya yeyi kendoku kuleka kidia ¹⁹Yesu wa waleza atadi amakwela alunga kuleka kudia kidi ngunza wudi ni eni tangwa diosu kakhala ni yala mu katshi kowu kaku lekoku kudia ²⁰Kashi ilumbu ya keza kiaka wa katula yala mu ilumbu yeneyina aka leka kudia ²¹Ata muthu kendoku kusha kitemba kia katataka ku muledi ukulu ivwa loni kitemba kia katataka ki kwapula muledi ukulu puta yiku hitangana ²²Muthu kendoku kusha maluvu ma katataka mu mbinda yikulu ivwa loni maluvu ma kuzanga ji mbinda ni maluvu ni ji mbinda ja zangana kashi ufeti kusha maluvu ma katataka mu ji mbinda ja katataka ²³Kilumbu kia lumingu Yesu wa tangunukanga ilanga ya kinzengi Alonguki jenji a helanga ndambu ya mbuma ²⁴a Farize a mu lejidi Tala kikuma kiakhi alonguki jeyi aku hangilanga mambu ma lekisa tshiku jetu kilumbu kia lumingu ²⁵Wa waleza nwa tangidiku eyi ya hangidi Davidi kilumbu kimoshi kia khedi ni fhunu ni nzala ya madia mwani ni athu akhedi nawu ²⁶Kiehi engididi munja Nzambi kiakhedi Abatiar nganga Nzambi wadidi mapa ma kijila mwani wa nona wahwa awa akhedi nawu ²⁷Yesu wakudidi lumingu lwa hangimini mu mamboti ma muthu muthu ka mu hangidiku kikuma kia lumingu ²⁸Heni hohu mwana muthu wudi fumu wa lumingu

Chapter 3

¹Wengila epi mu nzu ya isambu, mukatsi mwakhedi ni yala mumosi wa wuma koku. ²Atweka akhedi kumu tala ivwa wa lunga kumu wuka mu kilumbu kia lumingu, kikuma aswakadi kumu funda. ³Yesu wakula kudi yala wakhedi wa wuma koku etshi : zanguluka, makana akatshi. ⁴Yesu waleza athu : ni kuhanga mboti to kubola mu lumingu, ni kuhulusa moyi to kuleka kuhanga yidi mboti to loni? osu ahwena ne. ⁵Wa watala ni khabu ziosu, wekhina ni khenda kikuma kia kukola kwa mitshima miowu, waleza yala mwani owuna etshi : tandula koku, wadi tandulula, he Yesu wadi wukha. ⁶Mbala yimoshi a Fadishi awudika, aya kuhanga fwondu ni a Herodia kikuma kiaku mu jiya. ⁷Yesu ni alonguki jenji akatuka aya ku kiawu hunji diathu lawu dia katukidi ku Galilea, ⁸Ku Yudea, Ku Yeluselemi, ku mavula ma Yudea, ku Idemi, ku Yoludani, mu thotu ya Tir ni Sidoni, ni hunji dia athu lawu evidi mambu mahanganga Yesu, eza kudi mwani. ⁹Waleza alonguki jenji ahangiki kibeya mwani engidi, kikuma hunji diathu dileki kumu khundangana. ¹⁰Kikuma wa wukanga athu engi, akhashi osu akhedi kuzola ku mukwata ku mwila. ¹¹Tangwa jipevi jia bola jia mumonanga, jia bwanga mumiendu mienji ni kwakula ngolu etshi : Ayi wudi mwana wa Nzambi. ¹²Mwani wa wanganinini aleki kulombulula nani akhedi. ¹³Waninini ku mundonda, wa tambikini athu azodidi enji mwani eji kudi mwani. ¹⁴Wa sodidi athu kumi ni mbadi (wa watambikidi athumwa) kikuma akhadi ni mwani awa tumingi mu kulonga, ¹⁵ni kifumu kiosu awudishingi pevi jia bola. ¹⁶Wa sodidi : Simoni, wamu hwedi jina dia Pettulu ¹⁷Jaki mwana wa Zebede Jean pangi wa Jaki wamuhwedi zina dia Boenerges tendula athu afwana mikedi kedi ¹⁸ni Andela Philippo Barthemia Matai Thomashi Jaki mawna wa Alphe Thade Simon wa makanda mosu ¹⁹ni Yuda wa Iscarioti owu wa yekudidi Yesu ²⁰Kumanima Yesu wa vutuka kunzu hunzi dia hatu dia mu laba epi Yesu ni alonguki jienji ka mwekininiku epi ata mu tangwa dia kudia ²¹Kiela akwakwa jienji evwa ejidi kumu mona kikuma akhedi kwakula etshi wudi muthu wa pamba ²²Asoniki akatukidi ku Yeluselemi akudidi etshi wudi ni diabulu mu katshi kenji wudi fumu wa pevi jia bola wenda wa jukaya ²³Yesu wa watambikidi wa waleza mu ingana kiehi Satana alunga kudi nwanisa enji mwani ²⁴Ivwa Kifumu kidi kiakapanga kiku jingoku epi ²⁵Ivwa inzu yidi yadikapangana mu yowu mwani yikulenda oku kujinga ni okuna ²⁶Ivwa Satana wenda wadi nwanina enji mwani ivwa wadikapa mu luyalu lwenji luyalu lwenji luku jinga oku luku suka ²⁷Kushiku ni muthu wa lunga kwingila mu inzu ya muthu wa ngolu amukabi yima yosu konda theti ku mukasa mishinga kumanima dia ku mukasa mishinga walunga kuhanga yima yosu ²⁸Nienda nia nuleza ni kiedika kiosu etshi kubola kwosu kusawula kwosu kwa athu kwa kavidishiwa ²⁹Kashi kusawula pevi ya longu kwa kavidishiwa oku ata fioti muthu mwani owuna wahanga masumu ma mvula ni mvula ³⁰Yesu wa walejidi kiene kina kikuma eni akulanga etshi wudi ni pevi jia bola ³¹Mama enji ni apangi jenji eyiji atula amakana hanji atuma muthu mu kumu tambika ³²Athu hengi akhedi ashikama mu khulu yenji amulejidi etshi mama eyi ni apangi jeyi edi hanji enda kuhenga ³³Yesu wakula etshi nami wudi mama ni pangi kudi ami ³⁴Kiela wa tala ku manima ma katshi ka athu akhedi amujeta wakula talenu mama ni apangi jemi edi haha ³⁵Kosu owuna wahanga luzolu lwa Nzambi mwani yowu wudi pangi wa yala wa mukhetu ni mama wa memi

Chapter 4

¹Mbala yekhepi wa yandjika mu kulonga mu khulu ya meya majima hundji kiathu engi eza pena pena ni mwani anina mu watu ha wulu dia nzadi kumanima ashikama Hundji diosu diakhedi mu khulu ya Nzadi ²Wa walongidi mambu lawu mu yingana wa waleza ekhi mu malongi menji ³Ivwenu mukuni wa wudikidi mu kukuna ⁴Mutangwa dia kunanga

ndambu ya kheni jiabwa mu ndjila tujila tweza twa jidia⁵ Jiekha jiabwa mu mavu ma mayala omu mwa konda mavu jia teta mbala yimoshi kikuma mavu makhediku lawu⁶ Kashi mu tangu diatwa mwanina wa jiosha kikuma jia kondidi misodi jia wumini⁷ Kheni jiekha jia bwidi mu mitondu ya ndema ndema mitondu yakula ya dikashikisa jia butidiku ata kibundu ki moshi⁸ Kheni jiekha jia bwidi mu mavu na pumbu jia butidi mbuma jingi jia kamanga epi jiekha jia butidi makumi ma wa fokula kiekha makumi ma sambanu jiekha khama⁹ He wakula mwosu wudi ni matu ma kwivwa leka evi¹⁰ Tangwa Yesu akhedi enji mweni awa akhedi findama ni mweni ni alonguki jienji kumi ni mbadi amuhudidi kikuma kia yingana¹¹ Wa waleza kudi enu ngolu jia kifumu kia Nzambi jidi kashi kudi athu ekha yosu yidi mu yingana¹² Mu pila etshi ata enda tala atalulula epi kamu kamonoku ata evwa evulula kamu akondi kubakisa ivwa lona aleki kuleka Nzambi he Nzambi waka waloludila¹³ he wa waleza nwendoku nwa bakisa kingana eki kiehi nwa keziya yingana eyina yekha¹⁴ Mukuni wenda kuna ndaka¹⁵ Ekha eni yowu akubwanga mu khulu ya ndjila omu mwa kunini ndaka mbala yi moshi ivwa evwa Satana weza kuwatambula ndaka ya kunini kudi eni¹⁶ Ekha eni yowu akunini mu mavu ma mayala eni yowu ivwa evwa ndaka enda kuyinona ni kieshi¹⁷ Kashi keshiku ni misodi ata umoshi kudi eni kashi enda kukasa mutshima mu tangwa ditshotu Kumanima kienda kwiza pukumunu ni minianga kikuma kia ndaka enda kubwa mbala yi moshi¹⁸ Ekha edi awa akuna mu katshi kia ndema ndema Enda kwivwa ndaka¹⁹ Kashi mambu ma kifutshi wiya wa kimvwama kia kifutshi ni nzala jiekha jienda jiya ndaka ndaka yendoku ya buta mbuma²⁰ Ku tshuka ekha edi awa akuna mu mavu ma pumbu enda evwa ndaka enda yi kumbula yenda ya buta yibundu ekha makumi masatu ekha makumi masambanu ni nkama²¹ Yesu wa waleza etshi nwa mona kadi muthu ni mwinda munzu awu sheki mu mashina ma kinda to ma muhela nwendu ku wusenda mu katshi ni ku utulula ha panda²² Kikuma kushiku ni kijima kia swekama kia kaleka kwijianga to kia kisweki kia kejianga noku kudi athu²³ Ivwa kudi ni muthu udi ni matu mu kwivwa leka evi²⁴ Wa waleza kebenu ni manu kwivwanga kikuma kitesulu kinu kuteshilanga kieni kioki akalul teshila kumanima akanu yika²⁵ Kikuma owu wudi naki akamuyika owu wa konda aka mutambula ata eyi edi naki²⁶ He wakula kifumu kia Nzambi kidi mudi mukuni uku kunanga kheni mu mavu²⁷ Wenda kulangala mu pipa mu mwanina wa tokama kheni jienda mena ni kukula konda kwijika kiehi²⁸ Mavu menda kubwa mbuma omu mweni theti mutayi kumanima muhupu kutshuka kheni²⁹ He ivwa kheni ya kola yenda kubwa kikuma tangwa dia kusanda dia lunga³⁰ he wakula kufumu kia Nzambi tu kukitesa niekhi to kieyi kingana twa lunga kuta muku yitendula³¹ Yidi mudi kheni ya moutarde eyi ivwa ayi kuna yidi yibibi kamu mu kheni jiosu jia mu mavu³² Kieni kioki ivwa ayikuna yi kukula yekhina yijima kuhita mitondu yosu ya mu kibundu ni mintangu yi jima kikuma tujila twaku wulu tutungi ma zamba mu mashina ma kivudi³³ Ni yingana yingi mudi eyi wa walezidi ndaka ni muku wasenda ejiki³⁴ He ka walezangoku ndaka konda kingana kashi mu tangwa diedi endjimweni wa tendulanga yosu kudi alonguki jienji³⁵ Kilumbu kiene kina tangwa atula mu kingweji wa waleza twendenu sambwedina³⁶ He watshina hundji aya ni Yesu kikuma akhedi kadi mu watu mekha makhedi hohu epi³⁷ Funji ya ngolu ya nikisa meya ya yandjika kwingila mu watu pena pena watu uzadi meya³⁸ Kashi Yesu endjimweni wakhedi kumanima dia watu wa langala awulu dia muledi Amu tokimisa muku muleza Longi wa mweniku ni twa zola kufwa³⁹ Kia tokamayi wanganina muhunga wakula Dibati lembama muhunga wa lembama hekhina zoon⁴⁰ He wa waleza kikuma kiakhi lweva woma nusuku ni lukwikilu⁴¹ Azadidi ni woma akula owu mweni owu mweni owu kama nani ata muhunga ni meya majima menda mulemvukila

Chapter 5

¹A zawukidi musambwa dia meya mu kifutshi kia Geraseniens² Kiela Yesu wa wudika mu kibeya yala mumoshi wakhedi ni pevi ya bola wakatukidi ku maziamu weza kudi Yesu³ yala mweni wakhedi kujinga ku maziamu ata muthu kamu kukangoku mu kumulembika ata mu kumukasa miyololo⁴ Amukasanga mbala lawu ni miyololo ni yibende mu miendu wa betulanga miyololo ni kuvuka yibende Ata muthu kakhediku ni ngolu jia ku mulembika⁵ Pipa ni mwanina wa khalanga ku majiamu ni mu mindonda wakhedi kungania ngolu ni kudilemika ni mayala makusekisa⁶ Kiela wa mona Yesu alaha waya fishi kwakhwidi mweni wafukama kumesu ma Yesu⁷ Wakula mu ndaka ya ngolu ekhi wazola kungu hanga Yesu mwana wa Nzambi wudi ku wulu Nienda nia kubondila mu zina dia Nzambi ungu yangisoku⁸ Kikuma wakhedi kumu leza etshi udika mu katshi ka yala owu ayi pevi ya bola⁹ He Yesu wa muhula etshi zina dieyi nani mweni wa vutula etshi zina diemi Legion kikuma tudi lawu¹⁰ Eni amu bondila epi mukuleka kuwakaya mu kifutshi kia Geraseniens¹¹ Kaka mutangwa dienedina kibuka kia ngulu kiakhedi kujinga mu miwanda¹² Pevi ya bola jia bondila Yesu etshi tutumi kudi angulu enawana twingidi mukatshi kowu¹³ Yesu wa wahwedi njila he pevi jia bola jia kwingila mudi angulu. Angulu osu akatuka ku mundonda anwanina kwenda kudikonga mu meya mafunda makumi madi ma angulu afidi¹⁴ Athu akengidilanga angulu atshinini andidi kulombulula kwimbu. Athu lawu ejidi kutala mambu mahitidi¹⁵ Ejidi kudi Yesu kiela amona muthu oyuna wakhedi ni jipevi jia bola lawu wasikama wavwata mboti midu muthu wa muthu. Evidi woma¹⁶ Awana amweni mosu ma hitidi atedidi akowu tsangu jia hitidi muthu wakhedi ni jipevi ya angulu¹⁷ He abondididi Yesu mu kushisa kifutshi kiohu¹⁸ Kiela Yesu wanina mu kibeya Yala wakodidi walomba mu kwenda nenji¹⁹ Yesu kamu kumbudidiku kashi wa lejidi etshi vutuka kunzu eyi ku kikanda kieyi wu waleji mambu mosu mahanga Nzambi kudi ayi ni mamboti maku hangila²⁰ He mweni waya ni kulombulula mambu ma majima ma mu hangididi Yesu ku Decapola. kosu muthu wa yitukanga²¹ Tangwa Yesu kia zahuka sambwa edina dia jiya mu kibeya hunji di athu dia mu jeta mweni wakhedi wamakana mu khulu ya meya²² Jairus fumu mu mosi wa nzu ya yisambu watudidi. Kiela wa mona Yesu wa dikonga mu miendu yenji²³ Wa mu lombu lusalusu Mwana emi wa mukhetu wenda wa taba kivwa wa zola yiza wu

mushi mokhu akodi ajingi epi. ²⁴Yesu wendidi nenji, hunji dia athu dia mu labanga sambwa ni sambwa. ²⁵Kinga loni kwakhedi ni mukhetu wahwanga mashi mvula kumi ni jadi. ²⁶Wa yedidi hengi ku mokku ma aminganga lawu wa bidishidi yima yosu yakhedi nayi ka kodidiku kaka wa yolulukanga kamu. ²⁷Wevidi ntsangu jia Yesu wejidi mu katshi dia hunji dia athu kumanima wakwatidi muledi wenji. ²⁸Wakhedi kwakula etshi ivwa nia kwata kaka muledi wenji ni ku kola. ²⁹Kiela wa wukwata kuhita kwa mashi kwa hwidi wa kodidi. ³⁰Mbala yimoshi Yesu wevidi etshi ngolu jia mu wudika mu mwila. Walumuka wehula hunji nani wa kwatanga muledi wemi. ³¹Alonguki jenji amu vutudila wenda mona hunji dia athu diku kukukhunisanga kuku ni kuku kieyi epi ukuhulanga nani wa ngu kwata. ³²Kashi Yesu wa talanga mu khulu mu kumona nani wa hangidi mambu menamana. ³³Mukhetu kiejikidi mambu ma mubwididi weza kudi mweni ni woma wosu wadikongidi hashi kumesu ma Yesu wa muleza kiedika kiosu. ³⁴Mweni wa muleza mwana emi lukwikilu lweyi lwa kuhangila mambu ma mboti. Ndanga mu ngemba wa kola. ³⁵Kiakulanga Yesu kienekina misanji ya katukidi kunja fumu wa nzu ya yisambu a muleza mwana eyi wa mukhetu wa fwa Ekhi ukuyangishilanga longi. ³⁶Kashi tangwa dievwa Yesu makhedi kulonda eni waleza fumu wa nzu ya yisambu etshi wivwoku woma kwikila. ³⁷Ka kumbudidiku muthu mwekha mu kumushinjikila kaka Petulu Jaki ni Yowani pangi Jaki. ³⁸Atudidi kunja fumu ya nzu ya yisambu. Yesu wevidi athu ashanga mayema adilanga ni kudihwa pashi. ³⁹Tangwa diengika munzu wa waleza etshi mayema makhi ekhinu kudidilanga. Mwana kafidiku kashi walangala. ⁴⁰Eni a museyidi kashi wa wawudishidi hanji. wanona tatenji ni mamenji, ni alonguki jienji wengila nawu kusuku kwakhedi mwana. ⁴¹Wa mukwata ku kokhu wa muleza etshi Talita kumi yenda ya lombulula etshi mwana mukhetu nia kuleza etshi tokama. ⁴²Mbala yimoshi, mwana mukhetu watokimini wayanjika kikuba wakhedi ni mvula kumi ni jadi. A yitukidi hengi. ⁴³Wa walekishidi kalezoku muthu mu mosu mahangimini. He wa waleza amuhwa ima ya kudia.

Chapter 6

¹Tangu dia wudikidi hena hana waya kwimbuji diowu kwa butukididi. Alonguki jenji amu laba. ²Kilumbu kia lumingu kia lunga walonga munja Nzambi Athu amwivwanga ayitukanga hengi. Akhedi kwakula etshi kwehi anona malongi ama ngangu jeneji jamu katuka kwehi bipa huya kuhanganga ni mokhu. ³Keshiku mweni mu hangi mabaya mwana Madiya ni apangi a Jaki ni a pangi jenji Jose Juda ni Simoni. Apangi jenji akhetu kesuku ni etu menamana mosu mawa katulanga lukwikilu. ⁴HeYesu wa waleza etshi mbikudi kendoku kumwivila kwimbu diowu etshi kudi apangi jenji a nzu imoshi. ⁵Yesu ka lungidiku kuhanga ipa ya lawu washidi ndambu ya athu mokhu ahuluka. ⁶Kujiza kwowu kwa mitshima kwa mu yitukisa. Kumanima waya kulonga mu membu ma belabela. ⁷Wa tambika athu kumi ni mbadi wa watuma mbadi ni mbadi wa wahwa ngolu ha kuwulu dia pevi jia bola. ⁸Wa wahwa milongi wa kukonda kunona etshi kakima kamoshi loni ka kwenda naku mu njila kaka kamuhangu dipa loni mu kakhombi nushoku fwalanga mu mabenga. ⁹Wukatudi sapatu unoni miledi yadi. ¹⁰Wa waleza etshi kosu tangwa nkwakengila munzia muthu khalenu ti kilumbu kinwa kenda. ¹¹Kidi etshi dimbu di moshi aleka kunu yamba ho ka nwidididiku katukenu kukumunenu mavu kumiendu kidi kimbangi mu diambu dieni. ¹²Hendidi kulonga athu mu kukatuka mu masumu. ¹³Akayidi pevi jia bola lawu awashidi athu maji awa khedi kuyela amana kukola. ¹⁴Fumu Herode wevwa etshi jina dia Yesu dienda diaya kulululuka athu engi ayanjika kwakula etshi wudi Yowani mubotiki wa tokama mu lufwa kieni kioki ngolu jia Nzambi jekhina kudilombulula mu ipa. ¹⁵Athu ekha ni kwakula etshi wudi Elia ekhakama ni kubanza etshi wudi mbikudi wa tangwa dikulu. ¹⁶Herode tangwa dievwa ekina wakula etshi kesuku Yowani wuna vukidi mutu wa tokama. ¹⁷Kikuma Herode wakwatishidi Yowani wa musha mu boloku sambu wa tambudidi Herodias mukhetu wa pangienji Filipo. ¹⁸Mudiambu Yowani walejidi Herode etshi wa hangidiku pimbu muku tambula mukaji wa pangieyi. ¹⁹Kieni kioki Herodias ashidi Yowani mu kimbeni ni kuzola etshi amu jiji kashi kalungidiku. ²⁰Kikuma Herode wakhedi kwivwa Yowani woma wakhedi kwijika etshi wakhedi muthu wa mboti wa longu. Kieni kioki wakhedi kumukeba mboti mboti kwivwa kwa mwikinisanga mabanza kisakasaka kwa lawu. kumanima wa mwivwanga ni kieshi. ²¹Tangwa khinji ya lubutuku lwa Herode ya lumgidi wa hangika vitation wa tambika athu afumu asuta ni akumanda ni atwadishi akowu a Galilea. ²²Mwana mukhetu wa Herodias wejidi ku makinu wa kina makinu menji mahwa Herode ni athu a tambikidi kudia ku khinji ewwa kieshi. Fumu wehula mwana mukhetu ngu lombi yosu iwa zola ni kuhu. ²³Wa zenga ndefu wakula yosu ikulomba ni kukuhwa nayi ataka kitshini ka mavu mu thotu yemi niku kuvukila. ²⁴Mwana mukhetu wa wudika waya kuhula mamenji etshi ekhi ni kulomba kudi fumu mamenji wa vutula etshi mutu wa Yowani mbotika. ²⁵Wengila tswalu waya kumona Totila wa muleza etshi nguhu kikumweni ha dilonga edi mutu wa Yowani mbotika. ²⁶Totila wekhina khenda khenda kikuma kia ndefi ya zengidi kumesu ma athu. epi kikuma kia athu a tambikidieyi. Pila ya kuleka loni kumuhwa. ²⁷Totila wa tuma musuta wenda ku mukengidila mu kwenda ku munehina mutu wa Yowani musuta waya ku boloku wa vuka mutu. ²⁸Wamu sendila mutu ha wulu dia dilonga wahwa mwana mukhetu he mwana muketu wahwa mamenji. ²⁹Alonguki a Yowani kievidi etshi ajiya Yowani aya kunona mvumbi yenji aya ku yijika ku majamu. ³⁰Alonguki jia Yesu kievidi kienekina aya ku waningina ni Yesu homa ha moshi amuleza yosu ya ahangidi ni yalongidi. ³¹He wa waleza etshi ndanga nweni ku thotu ya zelu ni zelu nuhwidi kandambu ka yilumbu kikuma athu lawu akhedi kwiza ni kwenda ka kediku ni tangwa dia kudia. ³²Kieni kioki aya kwingila mu watu hendi mu thotu ya zelu ni zelu. ³³Awa mweni azanguluka mu kwenda athu lawu awejikidi kieni kioki anonini fishi athu osu ayanga kumiendu athu a membu lawu atudidi athu atheti. ³⁴Tangwa dia wudika mu watu sambwedina. Wa mona athu lawu wevwa kenda jiowu kikuma akhedi mudi etshi mikoku ya hinda muthu wa ku yisungula. Kieni kioki ayanjikidi ku walonga mambu lawu. ³⁵Kiela tangwa dia hita alonguki jenji eza kudi mweni ku muleza etshi homaha hedi

mavu ma zelu ni zelu tangwa epi diaya.³⁶ Watumi hendi mu membu ma bela bela asumbi yima ya kudia.³⁷ Wa wahwa mvutu etshi henu mweni wahwenu yima ya kudia amuleza etshi twa lunga kwenda kusumba mapa ma fwalanga khama jiadi kikuma tu wahu adi.³⁸ Wa wehula itshini ya mapa ingahi nudi nayi ndangenu nutadi kiela awaleza akula etshi mapa itshini itanu ashi mbadi.³⁹ Waleza athu osu mu kushikama mu yibuka mu mwangu.⁴⁰ Ashikimini mu yibuka ya hatu kama ni kibuka kia athu makumi matanu.⁴¹ Kiela wanona itshini ya mapa itanu ni ashi mbadi wa tala kuwulu wa sakumuna wa vuka itshini wahwa alonguki jenji mu kukapila athu a lawu. awa kapishi osu ashi mbadi.⁴² Adidi osu ti akutidi.⁴³ Atongunini epi itshini ya mapa hinda kumi ni mbadi ni itshini ya ashi.⁴⁴ Athu osu adidi mapa ni ashi akhedi mafunda matanu ma athu.⁴⁵ Mu mbala imoshi wengisa alonguki jenji mu watu mu kwenda teti heni sambwa dia Bethsaida. Tangwa dia khedi kuvutula athu.⁴⁶ Kiedidi waleza athu mu kuvutuka mweni wendidi ha wulu dia mundonda kikuma kia kusamba.⁴⁷ Kingweja kiabwa watu wakhedi watula ha kathsi ka meya mweni wakhedi henji mweni hashi.⁴⁸ Tangwa dia mona etshi akedi ni mutshindu watu wendi kikuma kia funji yakhedi ngolu. Mu tangwa dia makumi madi ni yimoshi dia pipa waya kudi heni ni kwendila ha wulu dia meya ma jima wakhedi kuzola etshi a hiti mu bela bela ni heni.⁴⁹ Kashi tangwa diamu mweni wenda kiba ha wulu dia meya heni a banjidi etshi mami wata atatula kia ngolu.⁵⁰ Kikuma amumweni osu ayanjika kutambika mudi pevi ya bola kikinweni wa wa wakusa wa waleza etshi khalenu ni ngolu kumwila owu ami nu khaloku ni woma.⁵¹ Wengila mu watu ni heni he funji ya lembama osu ayanjika kubula mabuku ayituka.⁵² Kikuma ka khediku kwiyika itshini ya mapa itanu heki ya zodidi kwakula mitshima yowu yakhedi yakola.⁵³ Kiedidi azawuka ha sambwa mu mavu ma akwa genesareth akasa watu.⁵⁴ Kiedidi a wudika mu watu awejikidi mu mbala imoshi.⁵⁵ A yanjikidi kwenda mu membu mosu ma thotu mwena yina a yanjikidi muku munehina athu akhedi ni makhashi kumwila ha wulu dia muhela kuma kwosu athu hevwanga etshi wudi hokuna ayanga.⁵⁶ Muma mwosu akhedi kwingila mu membu ni mu mavula muji thotu jieka akhedi kusha akhashi muma zandu akhedi kumu bondila etshi twalembwa kwetu twa buba kwetu ata miledi yeyi tu kwati kwetu athu lawu akhedi kumukwata akodidi.

Chapter 7

¹A Farize a wongimini pena pena ni Yesu ni ndambu ya asoniki akatukidi ku Yeluselemi.² Amweni etshi ndambu ya alonguki adiangama konda konda ku sukula mokhu.³ Kikuma a Farize ni a Zwifi osu kendoku kudia konda ku sukula pambu pambu mokhu mu kulaba tshiku ja akhakha jiowu.⁴ Ivwa a katukila ku zandu kendoku kudia konda ku disukula thethi ku mokhu. Enda kulemvuka ku jitshiku jiowu ja a mambuta mudi pila ya mboti ya kwovwa ma kopa ji nzungu mihela ni ima yekha.⁵ A Farize ni asoniki ahudidi Yesu etshi sambu diakhi alonguki jeyi enda kuleka ku jingila mu jitshiku ja amambuta kikuma emda kudia mapa mowu ni mokhu makonda kwovwa?⁶ Kashi mweni wa waleza akhubidi. Yesaya wakhedi ni kinunga kia longanga mambu menama athu eni awa enda kungu jitisa kukanwa kashi ku mitshima yowu edi thama ni ami.⁷ Isambu yenda kulomba ya pamba kikuma enda kulonga mambu ma kimuthu mudi tshiku jiowu ki jidi.⁸ Nwenda kulehudila tshiku ja Nzambi muku lemvukila malongi ma athu.⁹ Kumanima wa yika Nwejiya kia konga tshiku jia Nzambi mu kulaba kasu malongi menu ma kimuthu.¹⁰ Kikuma Moyize wakulanga etshi jitisa tatunu ni mamunu epi owu wakula kubola kudi tata enji to kudi mamenji a feti kumu jiya kamu.¹¹ Kashi enu nwenda kwakula etshi kidi muthu wa lombamba kwa tatenji ho wa mamenji lusalusu lwa katuka kudi ami ludi lwa konda kusumba.¹² Heni hohu nuku muhwoku kamu njila ya kusadisa tatenji ho mamenji.¹³ Nwenda katula lukumu lwa ndaka ya Nzambi mu mitshila yi nwa nonini. Nwenda kuhanga mambu ma kienekina.¹⁴ Wa tambika epi athu wakula Ngwivenu enu osu bakisenu.¹⁵ Ata kima kimoshi loni kienda kwingila mu katshi ka muthu kimu sumuni. Kienda ku wudika mu muthu kienda kumu sumuna.¹⁶ Ivwa muthu wudi ni matu ma kwivila evi.¹⁷ Yesu kia shishidi hunji diathu wengididi munzu alonguki amuhudidi thendula ya kingana.¹⁸ Yesu wakula : Nudi epi konda mayela nwendoku nwa mona etshi yosu yenda kwingila mu katshi ka muthu ikulendoku kumu sumuna.¹⁹ Kikuma yeneyina yi kulendoku ku vutuka mu mutshima wenji kashi yenda kwingila mu katshi ka vumu dienji yenda ku wudika ni kwenda mu kabini. Mu kutala Yesu wakudilanga madia mosu ma kipevi.²⁰ Wa waleza Idi eji yenda ku wudika mu muthu yenda kumu sumuna.²¹ Kikuma eyi yidi mu mutshima wa muthu mwenda kukatukila ngindu ja bola izumba wiji, wuloji.²² Izumba ngala ya mesu mutshima wa bola wiji unzweji kuzola kwa kunona kuhunina lulendu ni kilawu.²³ Ima eyi yosu ya bola yenda ku katukila mu katshi yenda ku sumuna muthu.²⁴ Hena hana waya ku thothe ya Tyri ni Siyoni wengila mu inzu imoshi kuzola loni muthu amwijiyi etshi wudi hohu kashi ka kukidiku kudisweka.²⁵ Kikithudi mukhetu mu moshi wa fuka kana ka mukhetu wakhedi ni ji pevi jia bola wevidi kutula kwa Yesu weza kudikonga mu miendu yendji.²⁶ Mukhetu wa khedi nzenza wa tetukidi ku Phenicie ya Syrie. Wa mu bondididi mu kukaya pevi ya bola mu mwanenji.²⁷ Wa muleza adishi thethi ana kikuma ishiku mboti mu kuhana mapa ma ana muku makonga kudi a mbwa.²⁸ Kashi mweni wa mu vutudididi etshi ee fumu ata ambwa edi ku mashina ma mesa enda kudia ifutufutu ya ana.²⁹ Waleza mukhetu kikuma wa makula ndanga mu ngemba pevi ya bola ya wudika mu mwaneyi.³⁰ Wa vutukidi kunjenji wa wana mwana wa langala ha muhela pevi ya mu wudika.³¹ Wa shishidi kifutshi kia Tyri wa hitila ha Sidoni kukhulu ya meya ma Galilea watula mu kifutshi kia Decapol.³² Amu nehinini kihulu kiakhedi ni pashi ya kwakula amu bondidididi muku musha mokhu.³³ Wa mukhulu kulepi ni athu homa ha kungama wa musha mokhu mu matu wa kwata ludimi lwenji ni mati.³⁴ Wa tala ku wulu wa himunuka wakula dikangudi.³⁵ Kikithudi matu menji ma kanguka eyi ya kashidi ludimi lwenji ya katuka he wa kukidi kwakula pambu.³⁶ Wa waleza mu kuleka kulombulula. kia wa lekisanga muku lombulula he wa watundula.³⁷ Akhedi kamu kuyituka ni kwakulanga wenda hanga ima yosu pambu pambu. Wenda wakusisa tumama yihulu ni kwivwa.

Chapter 8

¹Mu matshiku menamana kwakhedi ni funji dia athu hengi akondidi yima ya kudia Yesu watambikidi alonguki jienji wa waleza etshi ²Nidi ni khenda jia athu awa kikuma edi nietu kaka kashi ilumbu isatu kadidiku. ³Ni watusula endi mu manzu mowu ni nzala ekha payi yi ku wakwata mu nzila akulehuka kikuma engi akatukididi kulepi. ⁴Alonguki jienji a mu vutudidi kwehi tuku mwena yima ya kudia mwenomu mu thothu ya zelu kasu muku sepidisa athu awa. ⁵Mweni wa wehula etshi mapa ma ngahi nudi namu eni etshi tsambwadi ⁶he waleza athu mu kushikama hashi. Wanona mapa mosu tsambwadi wa tonda Nzambi wa ma vuka wa mahwa alonguki jienji muku mazeza kuthwala ya funji. ⁷Akhedi epi ni ndambu ya ashi. yesu wa tonda Nzambi he waleza alonguki muku wakapila. ⁸Adidi kamu tii akuta endidi ni yitshini yasadidi mu yisanji tsambwadi yi zima. ⁹Mu kutala kwakhedi ni athu mafunda mawana Yesu wa wavutudidi. ¹⁰Mbala yimoshi wa vutukidi mu watu ni alonguki jienji eni kiasadidi aya kowu mu thothu ya Dalmanutha. ¹¹a Farize atudidi ayanjika kusia pika ni Yesu mu kumu meka amu lejidi hahangi kipa. ¹²Yesu wayituka kibeni ngolu mwene etshi kikuma kiakhi athu alelu enda henga kipa nianu leza kiedika ata kipa nia ka nuleza oku. ¹³Kumanima wa wa sisa wanina epi nu watu wazawuka sambwa diekha dia jiya. ¹⁴Alonguki ajimbinginini muku nona madia akhedi kaka ni dipa dimoshi dijima mu watu. ¹⁵Yesu wa wakebisa mwene etshi kebenu nukhaloku mudi khisi yenda kunanisa mapa bosu a Farize ni Herode ¹⁶Alonguki alezangananga etshi wenda wakula kiene kina kikuma tusuku ni mapa. ¹⁷Yesu wejiki mabanza mowu mwene etshi kikuma kiakhi nuku dingangananga mu mabanza mukuma ni kukonda mapa nushiku kubakisanga mitshima mia nwikhina kukola. ¹⁸Nudi mi mesu nushiku kumonanga nudi ni matu nushiku kwivuanga nushiku kubambukanga. ¹⁹Tangwa dinwavukidi mapa matanu yitshini yitshini kudi athu mafunda matanu isanji ingahi nwazadishidi ni itshini ya mapa ma nwatongunanga eni etshi kumi ni yadi. ²⁰Kinwa vukidi mapa tsambwadi muku kapila athu mafunda mawana isanji ingahi nwa tongunini tsambwadi. ²¹Wa waleza ni kiki nwendoku nwa bakisa. ²²Atula ku Bethaida athu anehina Yesu povu amulomba Yesu amushi mokhu. ²³Yesu wa munona ku khoku wa wudika nenji mu khulu ya dimbu wamu lokudila mati kumesu wa musha mokhu wamuhula ekhi wu kumonanga. ²⁴Mweni watala waleza Yesu etshi nienda nia mona athu mudi mitondu yi kukibanga. ²⁵Yesu wa musha epi mokhu mbala ya kiadi mu mesu muthu kia wamona mboti wa yanjika kumona yima yosu mboti mboti. ²⁶Yesu wa mutusula waya kunzu enji wa muleza etshi wuhitoku hembu. ²⁷Mweni Yesu wakatuka ni alonguki jienji aya mu membu ma Cesaree dia Fidipa mu nzila wa wehudidi etshi athu enda akula etshi ami nami. ²⁸Amu vutudidi Yoani mbotika ekha enda akula etshi Eliya akowu etshi mumoshi wa ambikudi. ²⁹Wa wehula eni kasi enu nwabanza etshi nidi nani Petulu wamu vutudila ayi wudi Khidishitu. ³⁰Yesu wa walekisa ka lezoku ata muthu mu moshi. ³¹Yesu wayanjikidi kuwalonga kikuma kia zipashi zikumwijila mwene etshi mwana muthu afeti kuniokwama amambuta dibundu ni amambuta nganga ni alongi ajitshiku aka mubeya ni kumujiya kumanima dia ilumbu yisatu waka tokama. ³²Wa walezanga kitelengi he Petulu wa mu pusa mukulu ni kumuyana. ³³Kashi Yesu walumuka watala alonguki jienji wayana Petulu kiangolu kamu mwene etshi katuka pena pena ni ami Satana wenda washia mabanza kudi athu kashi kudi Nzambi loni. ³⁴Mu kutala Yesu wakudidi kudi funji ni kudi alonguki etshi ivwa muthu wa zola ku laba ami afeti kuleka ku dibanjila enji mwene athuti kulunji dienji angu labi. ³⁵Kikuma kosu owuna wa zola kuhulusa moyi wenji wakawubidisa owu wa kapidisa moyi kikuma kia ami ni kikuma kia nsangu ya mboti wakahuluka. ³⁶Ekhi yidi mfunu ya yitangana kudi muthu kufuka kifutshi kiosu to kubidisa moyi mu kungulaba ami. ³⁷Kie kima muthu alunga kuhanga mu kusumba moyi. ³⁸Kosu owuna wa ngwivwa soni ni soni ja ndaka yemi mu katshi ka athu alelu akwa yizumba ni kubola mwana wa Nzambi epi wa ka wevwa soni tangwa dia keza kuvutuka ni lukumu lwa tatenji ni ha wanjo.

Chapter 9

¹He Yesu wa waleza mu masonga nienda niakula kudi ekha mukatshi kienu kakafwoku konda kumona kifumu kia Nzambi kiji ni ngolu. ²He kumanima ma yilumbu yisambanu Yesu wanona ni mwene Petulu Yakobi ni Yowani waya nawu ku wulu dia mundonda kumanima wabalumukini ku twaka yowu ³miledi yendji yekhina kitoku ni kungedia yatoka thoos ata musukudi miledi mumoshi kaku lungoku ku tokisa kienekina. ⁴He Eliya Moze awudikidi ayandjika kusolula ni Yesu. ⁵Kieni kioki Petulu wa vutula mvutu waleza Yesu longi kudi pimbu kudi etu muku sala aha tushi ndjila tu tungi ngandu yisatu yayeyi ya Moza ni ya Eliya. ⁶Kikuma Petulu kejikangoku ekhi akwakula kikuma wevidi kiwuni. ⁷Dituti dieza dia wa jieta ndaka yi moshi ya wudika mu matuti owu wudi mwana meni hu niazola mwivilenu. ⁸Mu kimwasa atala mu khulu yowu kamweniku ata muthu kaka Yesu. ⁹Kia kulumukanga mundonda Yesu wa waleza kakuloku mambwama kudi muthu amamweni ti kilumbu mwana muthu aka futumuka mu lukwa. ¹⁰A swekidi ndaka eyi adihwasanga eni nieni ekhi yiku lombululanga ku futumuka mu lufwa. ¹¹Amu hudidi kikuma kiakhi a soniki enda kwakula ni Eliya afeti lwiza theti. ¹²Wawa vutula mvutu Eliya afeti kwiza watheti kikuma ashi yima mu ndonga hashi kikuma kiakhi asonika ni mwana muthu afeti ku mona pashi jingi ni ku munona lwa muthu wa pamba. ¹³Kashi nia nuleza Eliya weza kadi kashi amuhanga mosu mazodidi mudi kia masonika mu yisona kikuma kia mwene. ¹⁴Muku vutuka mu katshi ka alonguki awanini hunji mu khulu yowu asoniki enda ashangana pika nieni. ¹⁵Mu mbala yimoshi tangu dia wamona evwa kieshi kingi aya fishi mu kuwahwa mboti. ¹⁶Wehula alonguki jienji pika kiakhi nu kushanga nawu. ¹⁷Muthu mumoshi mu hunji wavutula longi niaku nehina mwanemi wudi ni pevi ya kukonda kwakula. ¹⁸Wa mukwata wa mubwisa hashi wa wudika mafufufulu ni kudikedikita wa dimina nia lombanga kudi alonguki jieyi awakayi kashi kakukidingiku. ¹⁹Wa waleza athu amitshima

yakola ma tangwa mangahi nia ka khalanga nienu matangwa makwa ni kubula kuludisa. ngu nehinenu nenji.²⁰ Amu nehina mwana kioki pevi ya mona Yesu ya bwisa mwana wayanjika kukonia wabwa hashi mafufufulu ma muhudikanga mu kanu.²¹ Yesu wehula tatenji wa vutula yanjika kilengi.²² Wa mukonganga kadi kadi ku thuya ni mu meya medidi ku muzanga kivwa wa lunga kuhanga mwa kima twividi khenda musadishi.²³ Yesu wa vutula kivwa wa lunga yosu yidi ya lunga kwa ohu wudi ni lukwikilu.²⁴ Mu mbala yimoshi tata wa mwana wa ngania mu ndaka ya ngolu nia kwikila iza ungukatudi mutshima wa kola.²⁵ Tangwa Yesu amona hunji dienda dieza kudi eni wakaya pevi jia bola wakula ayi pevi ya kukonda kwivwa ni ya kamama wudika nia kuleza wudika uvutukoku epi.²⁶ Pevi ya ngania ya konisa epi mwana henji kumanima ya wudika. Mwana wekhina mudi mvumbi hunji diakula etshi wafwa.²⁷ Kashi Yesu wa mukwata ni mokhu menji mwana yala wazanguluka.²⁸ Yesu kiengila munzu alonguki jienji amuhula mu kingenga kikuma kiakhi twa lekanga kulunga kukaya pevi eyina.²⁹ Wa vutula pevi eyi enda kuyikaya kaka mu yisambu.³⁰ Akatuka homa hana hana aya ku Galileya Kakhediku kuzola athu ejiki kwehi edi.³¹ Kikuma wa longanga alonguki jienji wa waleza mwana muthu akamu hana ku mokhu ma athu aka mujiya tangwa akamujiya waka futumuka mu yilumbu yisatu.³² Kashi kejiyangoku kwakula kwenekuna evwanga woma muku muhula.³³ He atula ku Capernaum kiakhedi munzu wehula alonguki ekhi nwa khalanga kutendila mu ndjila.³⁴ Kashi adibata nee kikuma atendanga owu mweni owu mweni mu mambu ma tadila kimbuta.³⁵ Washikama wa tambika owu kumi ni mbadi he wa waleza kivwa muthu wa zola ku khala wa theti akhadi wa tshuka weni osu. Wa wanona ha mokhu he wa waleza kivwa muthu wa zola ku khala wa theti afeti ku khala wa thsuka weni osu nsadi weni osu.³⁶ Wanona mwana kalengi wa musha ha hashi kiowu wamu nona ha mokhu menji mweni wa waleza.³⁷ Mwsu wa kayamba mwana mudi owu mujina diemi wangu yamba ami he kivwa muthu wa ngu yamba keshiku ami kaka ayamba kashi ni muthu owu wangu tumini.³⁸ Yowani wa muleza longi twa mweni muthu wa kayanga pevi jia bola mu jina diayeyi twa mulekisa kikuma ka tulabangoku.³⁹ Kashi Yesu wakula numu lekisoku kikuma kushiku ni muthu wa lunga kuhanga kisalu kia pimbu mu jina dia memi akhadi epi ni ngolu jia kwakula kima kia bola ku nidi ami.⁴⁰ Mwsu kesuku mbeni weti wudi ni etu.⁴¹ Mwsu uku nuhwa kopa dia meya kikuma nudi enia ngulushi nia nuleza mu masonga ka kabisosoku lufutu.⁴² Mwsu wa bwisa kalengi mu moshi uku ngu kumbulanga yi ku khala pimbu amu kashi yala di jima mu shingu amu kongi mu meya ma jima.⁴³ Kivwa koku dieyi dienda kusenda ku wiji divuki.⁴⁴ Yidi kuwaha kudi ayi kukhala ni lujingu konda koku dimoshi ke kukhala ni moku madi kashi waya ku yilungi thuya twa konda kujima.⁴⁵ Ivwa mwendu weyi uku kubwisanga uvuki kikuma yidi pimbu kudi ayi kwingila mu lujingu lwa mvula ni mvula kikata ke ukhadi ni miendu yadi.⁴⁶⁴⁷ Ivwa disu dienda kubwisa dikatudi kikuma yidi pimbu kudi ayi kwingila ku wulu dia Nzambi ni disu dimoshi ke kukhala ni mesu madi kashi aku kongi mu bilungi.⁴⁸ Pambu jiwu kakufwangoku ni thuya tuku jimangoku.⁴⁹ Kikuma kosu muthu akamusha mungwa ku thuya.⁵⁰ Mungwa wudi pimbu kashi ivwa wa zanga thomu kiehi wu kuyivutula epi khalenu mungwa enu ni enu khalenu ngemba ni athu osu

Chapter 10

¹Yesu wa katukidi hana hana waya ku kifutshi kia Zude mu sambwa dia Yordani athu amu wongiminini wa yamjika kuwa longa.² A Farize ejidi ku muhula muku mu meka amuhula tshiku yetu yenda hana njila kwa muthu mu kuleka mukaji enji.³ Yesu wa vutudidi mu kivwa eki khia tshiku Moyize anu hwedi.⁴ Akudidi etshi Moyize wa hanini njila kudi yala mu kuhana mukanda wa ku kayila mukaji eyi.⁵ Ya khedi kikuma kia mitshima yenu ya bola anu sonikinini tshiku yeneyi.⁶ Kashi mu luyandjiku mwa khediku kienekina Nzambi wa wahangidi yala ni mukhetu.⁷ Kieni kioki yala waka katuka kunzu yowu waya kukangama ni mukaji enji.⁸ Owu mbadi akekina muthu mu moshi eshiku epi athu mbadi akekina muthu mu moshi.⁹ Kieni kioki Nzambi ivwa wakwedisa athu muthu kalendidiku kuwa kapula.¹⁰ Kiakhedi munzu alomguki amuhudidi namu.¹¹ Mweni wa waleza etshi mwsu oyuna waleka mukhetu wenji waya kukwela mukhetu mwekha wata mbongi ni mukhetu mweno owuna.¹² Pila yimoshi mukhetu walekangana ni mulumi wenji wakwela yala mwekha wata mbongi.¹³ He amu nehina ana abibi kikuma awashi moku awa sakumuni kashi alonguki awa kayidi.¹⁴ Kashi Yesu kiamweni kienekina khenda jia mukwata wa waleza etshi lekenu ana abibi eza kudi ami nu wakasa oku njila kikuma kifumu kia ku wulu kidi kudi awa edi mudi eni.¹⁵ Ejikenu etshi mu masonga owu waka leka kunona kifumu kia ku wulu mudi mwana mubibi kakengiloku.¹⁶ He wanona ana abibi a mokhu menji wa washia mokhu ni kuwa sakumuna.¹⁷ Kiela wa yandjika kukiba yala mu moshi wejidi fishi kudi mweni wafukimini mweni etshi longi wa mboti ekhi ni kuhanga mu kunona moyi wa mvula ni mvula.¹⁸ Yesu etshi kikuma kiakhi watambikila muthu wa mbotti kushiku ni muthu wa mboti kaka Nzambi.¹⁹ Wejiya tshiku eji kujiya muhtu loni kuta mbongi loni kukaba loni zitisa tatunu ni mama utoku kitemu kia luvumu.²⁰ Yala mweni wakula longi nienda kulemvuka mu yima mweneyina yosu yandjika kilengi kiemi.²¹ Yesu wa mutala wamu zola wa muleza etshi ayi muthu wakonda kima kimoshi sumbisa yima yosu yi udi nayi wuhani mbongu kudi atsukami wakana kimvwama kidi ku wulu. he iza wundabi.²² Kashi wekhina khenda khenda kikuma kia menama waya kieshi loni kikuma wakhedi ni yima yingi.²³ Yesu watala mu khulu yenji wakula kwa alonguki jienji kikudi pashi kudi awa edi amvwama mu kwingila mu kifumu kia Nzambi.²⁴ Alonguki ayitukidi mu mambu menama kashi Yesu wa waleza epi ana talu ekhi idi pashi mu kwingila mu kifumu kia Nzambi.²⁵ Kwa zeya kudi punda mu kuhita mu buku dia shindani kwa mvwama mu kwingila mu kifumu kia Nzambi.²⁶ Ekhinini kuyituka kwa ngolu ni kwakula kwenji eni etshi nani wa kahuluka ivwa mambu medi kienekina.²⁷ Yesu wa watadidi wakula yidi pashi kudi enu athu kashi kudi Nzambi yishiku ata pashi fioti.²⁸ Petulu wayanjika ku muleza etshi etu twasisa mosu ni isalu yetu tweza kulaba ayi.²⁹ Yesu wakula ni kiedika kiousu kushiku muthu waka shisa nzu yenji apangi jienji amala ni akhetu mama ni tata enji

ana jienji thotu yenji kikuma kiamemi ni kikuma kia tsangu ya mboti.³⁰ Akonda kunona matapishi mbala khama mu kifutshi manzu apangi amama mavu ni kuniokwama mu tangwa dia keza wakanona moyi wa mvula ni mvula.³¹ Kashi engi awa athetikila aka sukinina awa asukinina akathetikila.³² Akhedi mu njila mu kukanduka ku Yeluselemi Yesu kutwala yowu alonguki ayitukidi ni awa alabanga kumanima evidi woma he Yesu wa katuka epi ni akumi ni mbadi wa yandjika kwakula ama maka lunga ku mubwila thama loni.³³ Unikinenu twakanduka ha Yeluselemi ni mwana muthu akumuhana kwa anganga Nzambi ni asoniki aka mujiya ni ku mu hana kudi apani.³⁴ Aka mu seya aka lokudila mati ni kumu bulanga ni kumu jiya kashi kunima dia ilumbu isatu waka tokama.³⁵ Jaki ni Yowani ana a Zebede ejidi kudi mweni mu kwakula longi twa zola uhangikikuma kietu eyi yosu yitu ku kulomba.³⁶ Wa waleza nwa zola ni hangi ekhi kikuma kienu.³⁷ Akudidi tuhu njila tu shikami ni ayi mu kifumu kieyi mu moski ku kitata kieyi mukwovu ku kimama.³⁸ Kashi Yesu wa vutudila nwiwiku yi nwenda nwa lombwa nwa kunga kukuka mu kunwa kopa di nakanwa to muku kumbula mbotika ina kanona.³⁹ Amu lejidi twa lunga Yesu wa walwza kopa di na kanwa nwa kanwa aka nu botika mu mbotika eyi ami nia botama.⁴⁰ Kashi mu ama ma tadila nani waka khala wa shikama ku khoku diemi dia kitata ivwa loni ku khoku diemi dia kimama keshiku kudi ami mu kuhana kashi idi kudi awa menama ma hangiminini.⁴¹ Kiela alonguki ekha kumi amevwa ayandjika kwivila Jaki ni Yowani khabu.⁴² Yesu wa watambikidi kudi mweni wakula nwenda nwejika etshi awa enda kunona afumu a apani enda kuwa hita amambuta mu katshi keni enda ku wa yala.⁴³ Kashi malungidiku kukhala kienekina mu katshi kenu owu wa zola kwikina mbuta mu katshi kenu afeti kwikina muthu wenu wa kisalu.⁴⁴ Owu wa zola kwikina wa thethi mu katshi kenu afeti kwikina muhika wa athu osu.⁴⁵ Kikuma mwana muthu kejidiku mu kumuhangila kashi mu kuhangila ni kikuma kia kuhana moyi wenji mudi dikabu kikuma kia athu engi.⁴⁶ Atudidi ha Yeriko kia katukidi ni alonguki jenji ni hunji di athu mwana wa Tewe Bartime mufwa mesu mu lombi wa mbongu wakhedi washikana mu khulu ya njila.⁴⁷ Kievidi etshi wudi Yesu wa Nazaleti wa khedi kuhita wa yanjika ku ngania ni kulonda Yesu mwana Davidi ngwividi khenda.⁴⁸ Athu engi amu beyidi ni ku muleza adibati kashi wa ngania epi mwana Davidi ngwividi khenda.⁴⁹ Yesu wa makhana wa waleza amu tambiki atambikidi povu akula kikesa zanguluka wenda wa kutambika.⁵⁰ Wa kongwa mvwela mu lukalu wa sotuka weza kudi Yesu.⁵¹ Yesu wamu vutudididi wakula ekhi wa zola ni ku hangidi povu wakula fumu nia zola kumona epi.⁵² Yesu wa muleza nda lukwikilu lweyi lwa kukodisa tangwa dienedina wa lungidi kunona epi wa mu labidi mu njila.

Chapter 11

¹Tala kiela apusana ku Yeluselemi atudidi pena pena ni membu ama Bethphage ni Bethani ku mundonda wa Olive Yesu matumini alonguki jienji mbadi.² Wa waleza etshi ndenu ku dimbu edina didi kutwala yetetu kinu kutula nu kumona mwana punda wa kukasa ata muthu kamu ninoku kadi mukasululenu nu ngu nehini nenji.³ Ivwa anuhula ekhi nu kumu kasudilanga mulezenu etshi fumu wudi nenji fhunu wuku nu tusula mbala yimoshi.⁴ Endidi he awanini mwana punda hanji mu balabala wakukasa ha kisu kia lupangu amu kasuludidi.⁵ Athu akhedi hohu ehula etshi ekhi nuku kasuludilanga mwana punda owu.⁶ Eni awa vutudila pila ya walezidi Yesu awa tusula aya.⁷ Alonguki eni mbadi asendidi mwana punda kudi Yesu ashidi miledi yowu awulu dia punda kikuma Yesu ashikami ha wulu.⁸ Athu engi atandidi miledi yowu mu ndjila ekha atanda mandalala ma samba ma vukidi mu yilanga.⁹ Awa ayanga kuthwala ya Yesu akulanga Hozanna leka Nzambi asakumuni oyu ukwizanga mu jina dia fumu.¹⁰ Lusakumunu lukhadi kudi owu wu kwizanga kuneha kifumu kia Tata Davidi Hozanna kwa Nzambi wudi ku wulu.¹¹ Yesu wengididi mu Yeluselemi waya ni munzu ya Nzambi watala yima yosu mu kingweji waya ku Betani ni alonguki kumi ni mbadi.¹² Kilumbu kia laba kia katukila ku Bethani mu kuvutuka ku Yeluselemi wevwa nzala.¹³ Wamweni ha laha mutondu wa ma Figue wakhedi ni yisaka waya kutala ivwa walunga kunona yibundu kashi kiatala pena pena wa mweni kasu yisaka kikuma ya khediku nsungi ya kuhela mbuma jia Figue.¹⁴ He wa shinga mutondu ata muthu ka kudioku kibundu kieyi alonguki jenji evidi mambu menamana.¹⁵ Kiatula ku Yeluselemi wengila munzu ya Nzambi wayanjika kukaya awa akhedi kusumbisa ni akhedi kusumba mu katshi ka nzu ya Nzambi wa mwangini mesa ma atshienja mbongu ni itshi ya asumbishi a pombo.¹⁶ Walekisa etshi muthu kuneha kima kia kusumbisa munzu ya Nzambi loni.¹⁷ Wa walongidi etshi asonika ku mukanda wa Nzambi nzu ya memi ya kakhala nzu ya yisambu kikuma kia makanda mosu kashi enu nwa yikinisa nzu abandi.¹⁸ A nganga Nzambi ni asoniki kievidi mambu makudidi Yesu ahenganga pila ya kumujiya Kashi akhedi ni woma wenji kikuma hunji dia athu diakhedi kuyituka malongi menji.¹⁹ Kingweji kiabwidi aya kowu.²⁰ Mu suka kia vutukanga awana mutondu wa Figue wosu wawuma.²¹ Petulu wabambukidi mambu mahitidi wehula Yesu longi tala mutondu owu wa lakhidi wa wuma.²² Yesu wa waleza etshi kwikilenu kwa Nzambi.²³ Kosu owu wakula kudi mundonda etshi tumuka aha ndanga ubu mu meya konda kukhala ni pika ku mutshima wenji washia lukwikilu mosu ma wakula ma kuhangama Nzambi uku mahanga.²⁴ Kieni kioki nia nuleza kiosu kinwa lombwa kudi Nzambi ukulungisa.²⁵ Ivwa wenda wa sambila Nzambi ubambuka etshi wudi ni diambu ni muthu muvidishidi Nzambi ku wulu ukukuvishila kubola kweyi.²⁶ Kashi uleka kuvidishila mukwenu ayi epi Nzambi ka kukuvishila oku.²⁷ A vutukidi epi ku Yeluselemi tangwa dia Yesu wa kibanga munzu a Nzambi a nganga Nzambi amalongi a jitshiku ni amambuta dibundu ejidi kudi mweni.²⁸ A muhudidi kiyeka ekhi ukuhangila mambu ama mosu nani wa kuhwa kiyeka kieni.²⁹ Yesu etshi nia zola kunu hula kima kimoshi nu nguhwa mvutu ami he ni kunu leza kwehi ku kukatukanga kiyeka kinidi naki.³⁰ Mbotika ya Yowani yakatukidi ku wulu to kudi athu nguhwenu mvutu.³¹ Ayanjikidi kushia pika eni etshi twakula etshi Nzambi wa mutumini uku tuhula etshi ekhi nwa lekidi ku kumbudila Yowani.³² Kashi

ivwa twakula atshi athu amu tumini hunji dia athu diku tuhanga kubola.³³ Amu vutudila mvutu etshi tushiku kwijikanga Yesu etshi ami epi ni kunulewza oku kiyeka kinidi naki kweyi kia katukila.

Chapter 12

¹He Yesu wa yandjika kulonga mu yingana wakula muthu wa kunini vinu yimoshi watunga kibaki mu khulu ya vinu wa shimini bukhu dia meya wa tungidi kibaka mu kukengidila meya wahwa vinu mweni kudi asadi mu kulaba wa kiba. ²Mu tangwa dia lunga watuma muhanga mu moshi kudi akwa vinu kikuma kia kunona kudi eni jimbura jia vinu. ³Kashi amu kwatidi amu bula amu tisula mokhu. ⁴Wa watumisa epi mbala yekha musadi mwekha amu lemika mu mutwa amu hanga mambu ma soni. ⁵Wa tuma epi musadi mwekha amu jiya a hangidi awa osu kienekina kubuka ekha ni kujiya akowu. ⁶Akhediku epi ni muthu wa kutuma mwana wa hitangana kuzola wakhedi muthu wa tshuka awa tumini wakula aku jitisa mwana emi. ⁷Kashi akwa vinu alezangana tala mukwa vinu dieni wa kadi sadila izenu tu mujiyi diaka tusadidi. ⁸Amu kwatidi amu jiya amu konga hanji ya vinu. ⁹Kieneki mukwa vinu ekhi aku hanga wakeza wa panza akwa vinu wakahana kisalu kudi ekha. ¹⁰Nwa tangidiku isona eyi yala dia kongidi atungi amanzu diekhina fhunu. ¹¹Menama makatukudi kudi Yesu medi pambu kumesu metu. ¹²A henganga kukwata Yesu kashi abanganga athu kikuma ejiyanga etshi wakudidi kingana kieneki muku wa bedisa eni akatukidi aya. ¹³He eni amu tumisa ndambu ya a Farize ni akwa Herode muku muswamina mu jindaka. ¹⁴Kia tudidi amuleza longi wendoku kwivila muthu wendoku epi ku kapula athu wenda kulaba njila ya Nzambi mu masonga idi kiene kina mu kufuta kitadi to loni kudi Cesar. ¹⁵Kashi Yesu wejiyanga mabanza mowu ma ukhubidi he wa waleza ekhi nwa zola kungu tadisa ngu nehinenu pata yimoshi ni tadi. ¹⁶A nehini pata yimoshi kudi Yesu. Wa waleza mbunzu eyi ya nani ni yisona eyi avutula ya Cesar. ¹⁷Yesu wakula hanenu kudi Cesar ima yidi ya Cesar kudi Nzambi yima idi ya Nzambi. amu yitukididi. ¹⁸He akwa Saduce enda kwakula etshi amvumbi ka katokama oku eza kudi mweni amuhudidi. ¹⁹Longi Moyise wa sonikini kikuma kia etu ivwa muthu mu moshi wa fwa washisa mukhetu konda mwana pangi enji uku nona mukhetu mwenowna wabuta nenji ana kikuma kia pangi wa fidi. ²⁰Kwakhedi ni apangi tsambwadi wa theti wanona mukhetu wafwa konda kushisa mwana. ²¹Wa zodi wa munona wafwa ata mwana wa kushisa loni mutshindu umoshi ni wa kisatu. ²²He wa ki tsambwadi ka shishidiku ata mwana kutshuka mukhetu mweni wafwa. ²³Mu kutokama kiaka vutuka mu lujingu mukhetu mweni owuna wa kakhala wa nani kikuma owu tsambwadi amu kwedidi. ²⁴Yesu wakula heni hohu nudi mu kubola kikuma nwijiku ata isona ata ngolu ja Nzambi. ²⁵Kikuma kia katokama mu katshi ka amvumbi aka khaloku ata akwela ata akwedisa kashi aka khala mudi a wanjo ku wulu. ²⁶Kikuma kia amvumbi aka futumuka nwa tangoku kadi mu mukanda wa Moyise ukwakudilanga mutonde wa lemanga thuya. Ma sonikiwa mwenomuna etshi Nzambi waleza Moyise nidi Nzambi wa Abalahami Nzambi wa Izaki ni Nzambi wa Yakobi. ²⁷Yesu wa yikidi ethsi Nzambi udi Nzambi wa athu amoyi keshiku wa athu afwa. kieni kioki nwenda kudihunina hengi. ²⁸Musoniki mu moshi wevidi athu ni kusha pika wa mweni etshi Yesu wa hanini mvutu ya pambu wa muhudidi khie tshiku ya hitangana fhunu. ²⁹Yesu wavutula tala tshiku ya hitangana fhunu. Hunikina Isaeli fumu Nzambi wetu udi fumu mu moshi. ³⁰Ufeti kuzola fumu Nzambi weyi mu mutshima umoshi mu moyi weyi mu mabanza meyi ni mu ngolu jieyi jiosu. ³¹Tala tshiku ya zodi ufeti kuzola mukwenu ki wenda ku dizola ayi mweni. Kusiku tshiku jiekha ja hita yeneyi. ³²Mu sokini wakula mboti longi ma wakula medi masonga fumu wudi Nzambi mu moshi. ³³Kishiku ni mwekha wudi mudi mweni. Kuzola Nzambi ni mutshima weyi wosu mu kubakisa kweyi kwosu ni mu ngolu jieyi josu kuzola mukwenu mudi ayi mweni kwa hita kuhana kwa makabu. ³⁴Yesu wa mweni etshi wa hana mvutu ya mayela wa muleza he ushiku thama ni kifumu kia Nzambi. kumanima ata muthu kamu hudidiku epi mihu. ³⁵Yesu wa vutudidi kia longanga munzu a Nzambi kiehi asoniki enda kwakula etshi Khidishitu wudi mwana Davidi. ³⁶Davidi mu kipevi wakula fumu wakula kudi fumu wemi shikama ku khoku diemi dia kitata ni okuna na kasha ambeni jieyi ku mashina ma miendu mieyi. ³⁷Davidi enji mweni wenda ku mutambika fumu kiehi Mesiya alunga ku khala mwana wa Davidi hunji dia athu mwivwanga mboti. ³⁸Mu malongi menji Yesu wakula kebenu ni alonguki ajitshiku enda kukiba ni mileidi ilepi ni kunonanga ji mboti muma mwa athu lawu. ³⁹Enda kusola yitshi ya theti mu znu ya Nzambi ni mu khinji. ⁴⁰Enda kukaba maznu ma afidi ni ku hanga isambu ilepi ilepi kikuma athu awa moni. aka nona ndola ijima. ⁴¹He Yesu wa shikimini mu khulu ya kinda kia makabu ma nzu ya Nzambi. Watalanga kia shanga fwalanga mu kipawu. A mvwama ashanga fwalanga jingi. ⁴²Mufwidi washa pata jadi yakhedi itshotu. ⁴³He Yesu awa tambika alongiku jienji wakula mu masonga nia nu leza mufwidi owu wa hana hitila athu osu awana asha mokhu mu kinda. ⁴⁴Kikuma athu osu ahsa mbongu ja konda fhunu kashi mweni ni kiwayi kienji wahana josu ja khedi naji mu kujingila.

Chapter 13

¹Tangwa Yesu dia wudikanga mu nzu ya Nzambi mulongiku wenji wa muhula etshi longi tala pambu ya mayala ama ni nzu heyi mweni wa muleza etshi. ²Wa mona nzu heyi ya kasala mayala ni mayala yaka konda loni kubwa. ³Kiakhedi wa shikama ha wulu dia mundonda wa mitonde ya Olive ha sambwa dia nzu ya Nzambi Petulu ni Jaki ni Yowani ni Andela eza ku muhula mu kitshweki. ⁴Tuleji tangwa ekhi mambu ama ma keza idimbu ekhi yaka lombuludila etshi makhina kwiza. ⁵Yesu wa yanjika muku waleza etshi kebenu ata mutu mu moshi kanu humbuloku. ⁶Athu lawu akeza mu jina diemi akanu leza ami nidi Khidishitu aka humbula athu lawu. ⁷Ivwa nwa yanjika kwivwa yitumba ni mayema ma yitumba nu diyangisoku. mambu menamana ma feti kwiza kieni kioki yaka khaloku khadi tshuka. ⁸Kikuma kifutshi ni kifutshi aka nwananga ifumu ni ifumu abula kunwana kunikana kwa mavu muma mwosu nzala ya kengila lawu luyandjiku lwa

misongu ya kuteta.⁹Khalenu ni kukeba akanu funda kudi afumu a hashi akanu bula nu znu ya Izambu akanu senda kumesu ma fumu a mavu a Ntotila kikuma kia ami yosu heyina yaka khala kimbangi kudi eni.¹⁰Kashi theti tsangu ja mboti yi feti kulongama thotu yosu.¹¹Tangwa dia kanu kwata ni kunu hana nu diyangisoku kikuma kiama nwa kakula kaka mutangwa diene dina waka khala ni kimbaku. Kesuku henu nwa kakula pevi ya Nzambi yaka nwakudila.¹²Pangi waka jiya pangienji tata waka jiya mwanenji ana ka keviloku atata jiohu ana lawu akafwa.¹³Athu akanu leka kikuma kiemi muthu awu waka kasa mutshima ni kilumbu kia tshuka muthu owuna wa kahuluka.¹⁴Kinwa kamona ama medi mabola ma hi tangana aka masha aha halunga kumasha muthu owu ukutanga ejiki awana edi ku Yudea atshini mu mindonda.¹⁵Muthu howu waka khala ha yangi dia nzu ka tulukoku mu kwingila mu znu mukunona ata kima kimoshi.¹⁶Ketshi muthu owu waka khala mutemu ka vutukoku ku henga kazaku.¹⁷Kashi khenda jidi kudi awa hedi ni ana ni awa aka nwisanga ana kikumbu kienekina.¹⁸Sambenu kikuma kilumbu mweni kia kaleki kukhala kia mashika.¹⁹Kikuma ilumbu yene yina ya kakhala yilumbu ya pashi pashi jia kakhala jingi mu pila etshi banda luyandjiku Nzambi wahangidi mavu ni kikumweni. Kwakahangama mambu mutshindu lawu.²⁰Kidi etshi Nzambi kekinishiku ilumbu yeneyina yitshotu ata muthu mumoshi kaka hulukoku kikuma kia awa asoluwa waka yikinisa yitshotu.²¹Kieni kioki kidi muthu wa nuleza etshi talenu Khidishitu to talenu wudi okuna nu mu kwikiloku.²²Kikuma ambikudi a luvunu ni a khidishitu akubidi akeza lawu akahanga yipa lawu kikuma epi akahuna athu lawu kidi loni ni asodiwa.²³Dikebenu nia nulejidi yosu eyi kutwala.²⁴Kumanima ma pashi eji josu ja kakhala yilumbu yene yina tangwa dia kekha pipi ngonda ka kahanokwepi tshemu.²⁵Tutumbwa twaka katuka kuwulu twa kabwa ngolu yidi kuwulu yaka kulumuka.²⁶Kumanima aka mona mwana muthu ni kwiza mu matuta ni ngolu jiosu ni lukumu.²⁷Kumanima wakatuma awanjo jenji heni akatambikisa asodiwa mu kundambu jiosu ji wana ja tshuka ya mavu ni ya kuwulu.²⁸Bakisenu malongi ma mutundu wa figue kioki mitayi yekhina kuhana mayiji nwijiye etshi tangwa dia kuteta dia lunga.²⁹Kitesu kimoshi tangwa dinwa kamona mambu ama matula nwijiye etshi wudi bela bela pena pena ni kisu.³⁰Makiedika nienda niakula mbandu eyi ya kahitoku mambu ama makaleka kwiza.³¹Wulu ni mavu dia kahita ndaka yemi ya kahitoku.³²Kashi mambu matala kilumbu ni tangwa ata muthu kendoku kejiya ata awanjo edi kuwulu ata mwana kendoku kejiya kaka Tata.³³Temukenu nulangaloku kikuma twendoku twejiya tangweki tudi.³⁴Ya fwanangana ni muthu wa kiba wa shisa nzu wa ana kudi athujenji akisalu muthu ni muthu ni kisalu kienji waleza muthu owu wenda kuleka kulangala mu kukonda kulangala.³⁵Kieni kioki nu langaloku kikuma nwendoku nwejiya tangweki fumu wa nzu akeza kuvutuka tangwa dieka mu pipi mukatshi ka pipi mu nzolu wa thethi to mu suka.³⁶Kidi weza mukitulumukina kanu wanoku nwa langala.³⁷Mambu ama ma nia nuleza na maleza kosu muthu nu langaloku.

Chapter 14

¹Feti dia Paki ni dia mapa makonda levila diambidi kuhangama mu yilumbu yadi afumu anganga Nzambi ni asoniki a henganga kikuma kia kukwatila Yesu ni kia kumu jiya.²Alezangananga keshiku mu tangwa dia khinji ivwa loni athu akwivwa khabu.³Tangwa Yesu akhedi ku Betania mu nzu ya Simoni mwenia bwashi kiakhedi ha mesa ni kudia mukhetu mu moshi wengila ni mulanghi wa mananashi na thalu wakangula wetshila Yesu mananashi nu mutu.⁴Ekha akhedi hohu abokutidi alezangana eni nieni kikuma kiakhi azangila mananashi menamana.⁵Mananashi ama alungidi ku masumbisa mu nkama jisatu mu kuji hana kudi awayi amunganinini hengi.⁶Kashi Yesu wakula mu lekenu ekhi nuku mu kwatishilanga khenda wahanga mambu ma pimbu kudi ami.⁷Nwenda kukhala ni awayi tangwa diosu nu zola nwa lumga kuwa hangila mambu ma pimbu kashi ami twaka khaloku nienu tangwa diosu.⁸Wahanga ama alunga kuhanga washia mananashi mu mwila wemi kikuma kia kungu jika.⁹Mu masonga nienda nuleza kuma kwosu kwa kalonga tsangu ya pimbu mu kifutshi kiosu athu akakula mambu ma nguhangila mukhetu owu aka mu bambukanga.¹⁰He Yudashi Ishikadioti mu moshi mwa longuki kumi ni mbadi waya kudi afumu anganga kikuma wazodidi ku muyekula.¹¹Afumu anganga kia mevidi akhedi mu kieshi amu shidi kishidi mbongu wakhedi kuhenga pila ya kumu yekula.¹²Kilumbu kia thethi kia khinji ya dipa dia konda levila tangwa dia jiyanga mikoku kikuma kia madia ma Paki alonguki amuhudidi kwehi tuku kulambila madia ma Paki kikuma wendi kudia.¹³Watuma alonguki jienji mbadi wa waleza ndenu ku vula nu kumona muthu wudi ni bungu dia meya mulabenu.¹⁴Kia kwingila mu nzu mulabenu lezenu mukwa nzu longi wehula diehi suku edi niku dila madia ma Paki ni alonguki jiemi.¹⁵Wuku nuleza mu wulu dia nzu suku dijima didi ni yitshini ni mesa ma lunga mweni mwomu nuku hangikila madia.¹⁶Alonguki akatuka avutuka ku vula awanini yosu kioki awalejidi akubikidi madia ma khinji ya Paki.¹⁷Mu kingweji watula ni alonguki kumi ni mbadi.¹⁸Kiakhedi ha mesa ni kudia Yesu wakula mu masonga nienda kuleza mumoshi mu katshi kenu ukudianga ni ami wuku nguyekula.¹⁹Ekhinini owosu khenda khenda ayanjika ku muhula mu moshi mumoshi keshiku ami kieni kioki.²⁰Yesu wawa vutudidi mumoshi mu katshi kenu kumi ni mabdi ohu hu kudianga ni ami dipa dienji mu dilonga.²¹Kikuma mwana muthu ukushisa kifutshi eki mudi kiama sonika mu mikanda kikuma kia mweni mu masoniku kashi khenda kudi muthu waka yekula mboti nga ka butukidiku.²²Kia dianga Yesu wa nona dipa wadi sambula wadi betula wa wahwa he wakula nonenu mwila wemi.²³Wanona kopa wa vutula matundu wa wakwa osu anwa.²⁴Wa waleza ama medi mashi medi kwivangana mashi ma tshakimini kikuma kia athu lawu.²⁵Mu masonga nia nuleza nia kanwoku epi maluvu menama tii kilumbu ki nia ka manwa mu kifumu kia Nzambi.²⁶Kia manishini kuyimba mwimbu endidi ku mundonda wa Olive.²⁷Yesu wa waleza enu osu nwaka ngu tshina kikuma ma sonama niaka jiya muhungudi mamemi maka mwangana.²⁸Kumanima ma kufutumuka niaka thetikila ku Galilea.²⁹Petulu wa muleza ata akwetu atshina ami niaka tshinoku.³⁰Yesu wa muleza mu masonga nia

kuleza pipa eyi ku twala nzolu akokudi mbala jadi uku ngu tuna mbala yisatu.³¹ Kashi Petulu wa muleza ata ni feti kufwa ni ayi nia kamahangoku owu osu akudidi kiene kina.³² Kwenokuna atudidi homa enda kutambika Gethsemani Yesu wa leza alonguki jienji etshi shikamenu aha ki naya kusambila.³³ Wa nonini Petulu Jaki ni Yowani kumanima wekhina khenda khenda wadiyangisa hengi.³⁴ Wa waleza moyi wemi wudi ni khenda tii ku lufwa khalenu aha nulangaloku.³⁵ Yesu wa pusa fioti wabwa hashi wa sambila etshi kukhala pila leka tangwa edi dingi hiti.³⁶ Wakula Abba Tata mambu mosu wa lunga kumahanga ngu katudidi kopa edi kashi keshiku mu luzolu lwemi kashi lwa yeyi.³⁷ Weza epi wawa wana alangala waleza Petulu Simoni wa langala wa lungidiku kukhala watokama ata tangwa dimoshi.³⁸ Tokama sambila mu kuleka kubwa mu pukumuni pevi yidi ni mabanza ma pimbu kashi mwila wudi wa lembwa.³⁹ Wa vutuka epi mu ku sambila ni kuvutukila ji ndaka jimoshi.⁴⁰ Wa vutukidi epi wawa wana alangala kikuma mesu mowu makhedi mabenga ka mweniku ekhi ku muleza.⁴¹ Weza mbala ya kisatu wa waleza nwenda kaka nwa langala ni kulembwa imeni tangwa dia lunga mwana muthu aku mukapa ku mokhu ma asumuki.⁴² Zangulukenu twendenu tala uku ngu kapa wa finama.⁴³ Kiakulanga tala Yudashi mu moshi mu akumi ni mbadi watula ni hunji ni ji ndjangu ni mitondu awatuma kudi anganga Nzambi asonikini amambuta a dibundu.⁴⁴ Mu yekudi wa wahwedi kidimbu kimoshi wakula mwosuwu ni kuhwa mboti ya tama mweni yowu mukwatenu mu sendenu malembi.⁴⁵ Tangwa dia tula waya kwa khedi Yesu wakula Rabi wa muhwa mboti ya tama.⁴⁶ Amusha mokhu amukwata.⁴⁷ Mu mbala yimoshi nu katshi kowu wa tapa nsadi wa nganga Nzambi wamu vuka diatu.⁴⁸ Yesu wa waleza etshi nwenda nweza kudi ami mudi nidi mwiji nwa vwatila mata ni jipoku ni mitondu kikuma kia kungujiya.⁴⁹ Tangwa dina khedi nienu niku nulomga yilumbu yosu mu nzu ya Nzambi nwangu kwatidiku kashi mambu ama ma sonikini mu mukanda malungisami.⁵⁰ Athu osu akhedi ni Yesu amu kong'a ekha amu tshina.⁵¹ Mwana yala mu moshi wa mulabanga wa vwatidi muledi bulanketi dia lin kumwila tangwa athu amukwata.⁵² Wa tshinini khonga wa shisa bulanketi.⁵³ Asendi Yesu kudi afumu amikhahilu awongimini ni mweni anganga Nzambi ama mbuta ni asoniki.⁵⁴ Petulu wa khedi ku walabila ha lepi wengididi mu lupangu lwa fumu a minkhayilu wa shikama ni akhengidi akhedi kwotila thuya muku di yandula.⁵⁵ Fumu wa nganga Nzambi ni athu ekha akhedi kuhenga kimbangi kia bola kia Yesu kikuma amu jiyi kashi kakimweniku.⁵⁶ Athu lawu akhedi kuhana kimbangi kienji kia bola kashi yimbangi yowu ya lungangana ngoku.⁵⁷ Ekha azanguluka ahana kimbangi kia bola sambu dia mweni akula.⁵⁸ Twa mwividi ni kwakula etshi niaka mwanga nzu ya Nzambi eyi yatungidi ku mokhu ma athu mu yilumbu yisatu nia katunga yekha ya kaleka kutunga athu.⁵⁹ Ata mambu mena mana malungidiku ni mambu makhedi kumu funda.⁶⁰ Anganga Nzambi azanguluka mu katshi ka athu hehula Yesu ushiku ni mvutu ekhi athu a kukufundilanga.⁶¹ Wa hwen'a mbimbi ata kima kia kwakula lona afumu jia anganga a muhula etshi ayi wudi Khidishitu mwana wa sakumuka.⁶² Yesu wa vutula nidi khidishiku waka mona mwana wa muthu tangwa di aka khala washikama ha kokhu dia kitata dia ngolu ni kwisa mu matuta ku wulu.⁶³ Fumu wa anganga Nzambi wa bakha miledi yenji wakula eh nwevwa enu mweni tudi epi ni fhunu ya themu.⁶⁴ Nwevwa matuka mendji ekhi nwakula heni osu amu bedisa wudi muthu wa lunga mu kufwa.⁶⁵ Ekha amu lokudila mati ku mbunzu amu bula mbata he akula bikula asuta amu senda ayandjika kumu bula.⁶⁶ Petulu wakhedi kumashina ma lupangi mwana kisaku mumoshi wa fumu anganga Nzambi weza kudi mweni.⁶⁷ Wa mona Petulu ni kwotila tuya muku katula mashika wamu tala mboti mboti he wa muleza ayi epi wudi Nazareeni Yesu.⁶⁸ Kashi watuna wakula niejikidiku niendoku epi niabakisa ekhi wu kwakulanga kumanima wa wudika mu lupangu nzolu wa kokula.⁶⁹ Kashi okuna mwana kisalu wamu mweni epi wa yandjika kuleza awa akhedi hohu muthu owu wudi kumoshi ni eni.⁷⁰ Kashi wa tuna epi mu matangwa mabibi awa akhedi nawu pena pena aleza Petulu makiedika wudi mumoshi wowu kikuma wudi ayi epi galilea.⁷¹ He wa yandjika muku dishinga ni vuka ndefi ni mwijiku muthu owu wunu kwakulanga.⁷² Kiela nzolu wazodi kokula Petulu wa bambuka yindaka jia mulejidi Yesu etshi nzolu kaka kokuloku kadi mbala jiadi ayi wakangu tuna mbala jusatu he wa yandjika kudila.

Chapter 15

¹Mu suka suka diosu anganga Nzambi ahangidi fuondu ni amambuta dibundu ni asoniki ni ambaku a ayuda. he a kashidi Yesu mishinga amu senda kudi Pilatu.² Pilatu wa muhula ayi wudi fumu wa ayuda Yesu wa vutula ayi wa makula.³ Anganga Nzambi ahuninanga Yesu mambu mengi ni kumu funda.⁴ He pilatu wa muhula epi wa haniniku mvutu mu mambu tala mambu aku kuhuninanga kudi athu awa.⁵ Yesu ata kima kia kuvutula lona kudi Pilatu ma mu yitukisa.⁶ Mu kosu khinji ya Paki Pilatu wa wudisanga muthu mumoshi wa boloku mu pila ya luzolu lwa athu owumweni.⁷ Mu boloku mwa khedi ni ajeneshi amanini kujiya athu mumoshi jina dienji Barabas.⁸ Hunji dia athu diendidi kudi Pilatu mu kulomba awa hangidi mambu menda kadi kuhanga kosu khinji.⁹ Pilatu wa wavutudila etshi nwa zola ni wudishi fumu wa ayuda.¹⁰ Kikuma wejikidi etshi afumu anganga Nzambi afundidi Yesu ku kinjongu.¹¹ Afumu anganga Nzambi apusa hunji dia athu dilombi Pilatu atusudi Barabas.¹² Pilatu wa wehula epi ekhi ni kuhanga kikuma fia fumu wa ayuda.¹³ Eni osu akula mu ndaka ya ngolu mu khokhi ha kulundji.¹⁴ Pilatu wa waleza kubola ekhi ahanga kashi angania epi ngolu mu khokhi a kulundji.¹⁵ Pilatu muku wahwa kieshi wa tusudidi Barabas wabudidi Yesu fimbu wa mu hana amushi ha kulundji.¹⁶ Apumbulu amwingisa mu lupangu kwa khalanga Fumu owu atambikidi apumbulu osu.¹⁷ Amu vwatisa mvwela ya menga ni pwa wa ndema ndema mu mutu kumanima amushidi a kulundji.¹⁸ Ayanjika ku muhwa mboti ni kwakula etshi mboti fumu wa ayuda.¹⁹ Amu bulanga mu mutu ni lukhengi ni kumu lokudilanga mati ku mbunzu amu fukiminanga ni kudihuna kumu sambila.²⁰ Kia manishini ku museya amu homuna kazaku kabenga amu vutudila miledi yenji amu wudisa mu kumu khokha ha kulundji.²¹ Alejidi muhiti wakatukidi ku mushitu mu kuzangula kulundji dia Yesu jina dienji

Simoni wa Cyrene tata wa Alexandre ni Rufus.²² Asuta asendidi Yesu ku Gologota disongidila homa ha yifuwa yaku mutu.²³ Amuhwedi maluvu ma kubunda ni khishi ya mire kashi kama nwiniku.²⁴ Amu khokidi a kulundji akapa miledi yenji yosu ayi budila bwadi mukwijika dikabu dia kosu muthu.²⁵ Yakhedi mu tangwa dia kisatu dia mu shidi ha kulundji.²⁶ Asonikini yisona ha wulu dia dibaya mu kulombulula kikuma kia lufwa lwenji etshi fumu wa ayuda.²⁷ Akhokhidi athu mbadi mumoshi ku koku dia kitata mukowu ku koku dia ki mama.^{28,29} Athu ahitanga ni kumutukana ni kumwalumuna mutu eni etshi aha ayi wakulanga etshi wakabwisa nzu ya Nzambi kumanima wa yi zangulusa mu yilumbu yisatu.³⁰ Dihulushi ayi mweni tuluka ha wulu dia kulundji.³¹ Pila yimoshi a Fumu ja nganga Nzambi ni alongi a jitshiku amu seyanga eni etshi wa hulushidi akowu kashi henjimweni kakulendoku kudihulusa.³² Ivwa wudi Khidishitu fumu wa ana Yisaleli dikatudi ha kulundji kikimweni etu tunoni kikuma tukwikidi. Awa akhokhidi ha Kulundji ni Yesu ayandjika kumu tukana.³³ Mu tangwa sambanu pipa yabwidi mu thothu yosu tii mutangwa dia kisatu dia kingweji.³⁴ Mu tangwa dia kisatu dia kingweji Yesu wa tatula mu ndaka ya ngolu etshi Eloi Eloi lama sabacthani disongidila Nzambi wemi Nzambi wemi kikuma kiaki wangu lekila.³⁵ Ndambu ya athu akhedi hohu kievwanga he akula etshi talenu wenda wa tambika Eliya.³⁶ Muthu mumoshi waya fishi kikuma azadishi kinuka ni vinu dia khadi wadi shidi ku luselu lwa laha wa muhwa wakula etshi tukutala lelu ivwa Eliya ukwiza kumu tulula.³⁷ Yesu wa tatudidi mu ndaka ya ngolu he wa fwa.³⁸ Muledi wakhedi mu nzu ya Nzambi ya bakhukidi mu mbala jadi yanjika ku wulu ni ku mashina.³⁹ Tangwa fuma wa asuta wakhedi wa makhana ni kutala Yesu wa mweni etshi wa fwa mweni etshi kiedika muthu owu wudi mwana wa Nzambi.⁴⁰ Kwakhedi epi akhetu atalanga ha laha Madiya Madeleni Madiya mama wa Jaki ni Jose ni Salome.⁴¹ Alabidi Yesu ni kumu sadisa tii ku Galilea akhetu ekha lawu amulabidi ku Yeluselemi.⁴² Kiela pipa yabwa kikuma ahangamanga mu lutshuku lwa lumingu.⁴³ Yozefi mukwa Arimate watudidi hohu wakhedi mbuta mu katshi ka mambuta osu wadikubikanga kikuma kia kifumu kia Nzambi ni kikesa kiosu wendidi kudi Pilatu mu kulomba mvumbi ya Yesu.⁴⁴ Pilatu wayitukidi mu kwivwa etshi Yesu wafidi kadi watambikidi musuta wenji mukwijika ivwa Yesu wafidi kadi.⁴⁵ Kievidi kudi musuta wenji etshi makiedika Yesu wafidi wa hana mvumbi ya Yesu kudi Yozefi.⁴⁶ Yozefi wa sumbidi miledi wa katula mvumbi a kulundji wa yi winda miledi waya ku yijika mu majamu ma mayala mahangikidi mweni kumanima ashia yala dijima dia pata majamu.⁴⁷ Madiya Madeleni ni Madiya mama ya Jose endidi kutala homa ha jikidi Yesu.

Chapter 16

¹Kilumbu kia lumingu kikia hitidi Madiya wa Magdala Madiya mama ya Jaki ni ya Salome asumbidi mananashi mu kuwasa mwila wa Yesu.² Mu suka suka dia kilumbu kia thethi kia posa endidi ku majamu kia wudikidi tangwa.³ Akwangananga nani uku tukokila yala didi ku twala ya majamu.⁴ Kia thuthidi mesu a mweni etshi muthu wa thuthula yala kikuma dia khedi dijima dijima.⁵ Engididi mu majamu amweni mwana yala wa vwata lopu ditoka wa shikama ku khokhu dia kitata eni a yitukidi.⁶ Wa waleza nwivwoku woma. Nwenda henga Yesu wa Nazaleti wa khokhidi ha kulundji wa tokimini mu lufwa. Keshiku haha talenu homa ha mushidi.⁷ Kashi ndenu lezenu alonguki jenji ni Petulu endingi ku Galilea. Kwenokuna nwa kamumona kioki anu lejidi.⁸ Awudikidi fishi mu majamu. Ayitukanga ni kutekita alejidiku ata muthu kikuma akhedi ni woma wingi.⁹ Mu suka suka kilumbu kia thethi kia posa kunima dia kutokama wa mwekinini thethi kudi Madiya madeleni kwa kayidi pevi tsambwadi.¹⁰ Wendidi wa lombulula kudi awa akhedi nenji kiakhedi kuyangangana ni kudila.¹¹ Kievidi makhedi kwakula etshi Yesu wudi ni moyi mweni wa mu mweni kamu kwikididiku.¹² Mu kulaba wa mwekhinini kudi athu ekha mbadi mu pila yekha kia khedi kwenda mu mwangu.¹³ Endidi kuleza alonguki akowu ekha kashi kawa kwikididiku.¹⁴ Ku tshuka Yesu wa mwekhana kudi kumi ni mu moshi ki adiangha ha mesa wa walongidi mu kukonda kwa lukwikilu ni kukhala ni mutshima wa kola mu kuleka kukumbula awa angu mona etshi nia tokama mu lufwa.¹⁵ Wa waleza ndenu muma mwosu longenu tsangu kudi athu osu.¹⁶ Owu wa kwikula ni wa botama wa ka huluka owu wa leka kukwikila wa kafwa.¹⁷ Talenu yipa ya ka mwekhana kudi akwikidi akakaya ji pevi mu jina diemu akakulanga ndaka jekha.¹⁸ Akakwata aniokha ku mokhu ivwa anwa ndenga ya kawa hangoku kima akasha mokhu kudi akhashi aka kola.¹⁹ Kunima dia ku wakusa waya ku wulu wa shikama ku khoku dia kitata dia Nzambi.²⁰ Alonguki endidi muma mwosu kulombulula tsangu ya mboti. Fumu wa wasadisanga mu kisalu kiowu malongi ma makhedi ma pambu kikuma yipa ya hangamanga.